



Komunikadu Imprensa

Tribunál Distritál Suai

20 Abril 2015

Tribunál Distritál Suai kondena pena prizaun tinan 17 ba arguidu krime omisídiu agravadu

Iha 16 Abril 2015, Tribunál Distritál Suai kondena arguidu FdC ho pena prizaun tinan 17 tanba provadu komete krime omisídiu agravadu hasoru nia feen, iha 29 Agostu 2009, iha Distritu Ainaro.

Tribunál prova katak arguidu taa iha lezada nia ren-toos, ulun, ain no liman no rezulta lezada mate kedas iha fatin akontesimentu. Kazu ne'e akontese wainhira lezada fila hosi igreja.

Tribunál prova katak aktu ne'e prienxe krime ne'ebé preve iha artigu 139 alinea (g) Kódigu Penál kona-ba omisídiu agravadu hasoru lezada hanesan nia kónjuje. Krime ne'e nia moldura penál hosi tinan 12 to'o tinan 25. Tribunál prova krime ne'e bazeia ba arguidu nia konfesa no testemuña nia depoimentu.

“Krime hasoru fetu nu'udar krime grave no akontese fila-fila iha fatin hotu-hotu iha Timor-Leste. JSMP hanoin katak governu tenke konsidera realidade hirak ne'e hanesan kestaun sériu iha sociedade no estadu, tanba fetu barak ne'ebé nu'udar feen tenke lakon sira nia vida hosi sira nia laen rasik,” dehan Diretór Ezekutivu JSMP, Luis de Oliveira Sampaio.

Iha julgamentu produsaun ba provas ne'ebé hala'o antes iha 26 Marsu 2015, liuhosi julgamentu movel iha Distritu Ainaro, arguidu rasik konfesa ninia hahalok no deklara katak nia oho lezada tanba diskonfia lezada halo relasaun seksuál ho mane seluk.

Testemuña FdC ne'ebé hamutuk ho lezada sai hosi misa depoimenta katak iha loron akontesimentu arguidu hein hela lezada besik igreja no wainhira sira sai hosi igreja arguidu hakbesik aan ba lezada no sem koalía liafuan ruma derepente arguidu ho katana taa iha lezada nia reen-toos, ulun, liman no ain. Testemuña hare katak lezada sofre ran sai barak no mate kedas iha fatin akontesimentu.

JSMP apresia desizaun ida ne'e atu kondena arguidu ho pena prizaun tinan 17 tanba pena ne'e bele rekoñese gravidade hosi krime ne'e. Pena hanesan ne'e bele enkoraja ema sira atu resolve sira-nia problema ho maneira ne'ebé laho violénsia.

JSMP husu ba parte hotu, governu, sociedade sivíl, igreja no comunidade tomak atu halo esforsu kolektivu hodi kombate krime violénsia doméstika ne'ebé kontinua buras iha sociedade. Ne'e

Rua setubal, Colmera, Dili Timor Leste

PoBox: 275

Telefone: 3323883

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

fenomenu sosial ne'ebé Estadu tenke intervein atu asegura katak nein elementu ida iha nasaun iha direitu atu hasai ema seluk nia vida. Feto nu'udar membru integral hosi sosiedade Timor-Leste tanba ne'e sira hotu tenke livre hosi kualker violénsia atu nune'e sira bele dezenvolve sira nia aan hodi kontribui ba dezenvolvimentu nasaun ida ne'e.

Julgamentu ba leitura akordaun ba kazu ne'e prezide hosi juis Dr. Alvaro Maria Freitas representa juis kolektivu, ministériu públiku representa hosi Dr. Jose Ello no arguidu hetan defeza hosi Dr. Manuel Amaral hosi Defensoria Pública.

Atu hetan informasaun liutan favor kontaktu direitamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Telefone:3323883 | 77295795